

14. maj 2019

UPA 2019/32

Aqqusinernik aqqissuussinernut pilersitsisarnernullu, ilisimalikkanik ataqatigiissaariitigaluni katersuivimmik, kommunillu susassaarfimmi suliniutaannik ikorfartuisarfimmik aqqusineqarnikkut ingerlatsivimmik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Hermann Berthelsen, Siumut)

Siumup periarfissaatillugu pingaartippaa inoqarfiit akornanni ilaatigut inuussutissarsiornerni inerisaanissaq siunertaralugu aqquserniorsinnaanerup aqqutissiuunnissaa. Taamaattumik Siumup anguniarpaa nunatsinni aqqusernit pillugit inoqarfiillu akornanni aqqusinniornissat pillugit ingerlatsivimmik pisortaqarfeqalernissaa.

Taamatuttaaq Sisimiuniit Kangerlussuarmut aqqusiniliortoqarnissaa ukiorpassuannortuni pilersaarutaasup piviusunnngortinneqarnissaa pimoorullugu sulissutigineqarnissaa Siumumiit oqariartuutigiuarsimasarput matumuunakkut naqissuserlugu oqaatigeqqissuarput. Taamaammallu siunnersuuteqartup Hermann Berthelsenip Siumumeersup siunnersuutaa tamakkiisumik tapersiissuteqarfigaarput.

Siumumi isumaqartuaannarpugut inuussutissarsiornikkut aningaasarsiornikkullu siuariartornissamik siunniussa qarutta attaveqaasersornikkut inerisaaneq siulliullugu suliareqqaartassagipput, tamannami periuseq aamma ilisimatuussutsikkut uppersarneqarsinnaasunik arlalippassuartigut takussutissiarineqartartoq ilisimalluinnarparput. Nunat saniligut Island aammalu Savalimmiut qiviaannaraanni annertoorejussuarmik aqqusinertigut mittarfitsigut assigisaasigullu inerisaanermikkut inuussutissarsiorneq taamatullu aningaasarsiorneq malunnaatilimmik kivinnekqarnerannik kinguneqarnikuusut Siumumi ilisimaaraarput. Taamaammallu attaveqaasersueriaaseq taamatut ittoq nunatsinnut eqqunneqarnissaa piffissanngortutut Siumumi isumaqarfigigipput, naak nunatut assigiinngissuteqaraluaqaluta.

Nunatta isorartunerujussuata inuttussutsikkullu ikittuinnaanitta attaveqaasersornikkut ullumikkutut inissisimanitta annertuutigut immakkut silaannakkullu atugassaqaartippaatigut. Tamanna ajunggilaq inerisarneqartuassaarli aamma suli.

Siunnersuuteqartorlu ilumoorpoq suli nunatsinni inoqarfiit inuttunerit marluk akornanni aqqusineqalersimannnginnattaluunniit, naak piffiit ilaanni, soorlu nunatta kujataani aammalumi Sisimiut Kangerlussuullu akornanni periarfissat allanit sanilliullugit pitsaalluinnaqqissaaraluartut. Killiffik tamanna allanngorluinnartariaqartoq Siumumi isumaqarpugut, taamaammallu siunnersuut manna tamakkiisumik Siumumiit tapersiissuteqarfigaarput.

Siunnersuuteqartup aqqusinernik aqqissuussinernut pilersitsisarnernullu ilisimalikkanik ataqatigiissaariitigaluni katersuivimmik pilersitsinissamik siunnersuutaanut ilaatigut tunngavilersuutigaa suliniuteqartoqareemat inoqarfiit marluk akornanni aqqusinniornissamik, tamannalu tassaalluni Sisimiut Kangerlussuullu akornanni aqqusinissaaq, inuussutissarsiornikkut aningaasarsiornikkullu annertoorejussuarmik nunamut tamarmut iluaqutissiisinnaasoq.

Kangerlussuup mittarfissuartut nunatsinnut qanoq pingaaruteqartiginera ilisimaaraarput, miffigineqarsinnaajuaannangajannera angallannerup iluani tamanut toqqissisimanartumik atugassaqaartitsisuvoq. Aammalu Kangerlussuup ullumikkut takonarissanit soqutigineqarluareersoq suli ineriartortinneqarnissaminut periarfissagissaarnera kialluunniit takusinnaagaa Siumumi isumaqarluta. Tassami nunatsinni takonarissat amerlisassagutsigit amerlanerusunik pissanganartunik inuiattut neqerooruteqartariaqarpugut, tamakkulu ilaatigut

Sisimiuniit Kangerlussuarmut aqqusinniortoqarneratigut pilersisinnaavagut, takornarissammi misigerusutaat tassaavoq pinngortitami nalissaqanngitsumi misigisassat immikkuullarissut pikkunartut, tamakkulu Sisimiut Kangerlussuullu akornanni ineriartortinnissaat periarfissagissaarput.

Siuliani oqaatigeriikkatsituut nunatta iluani inoqarfiit akornanni attaveqaasersornikkut aqqusinertigut inerisaanissaq Siumumiit assorsuaq ikaarsaarfigissallugu piumassuseqarfigisarput nalorninaatsumik suliassaqarfinngornissaa piumasaraarput, tassami aqqusernit pineqartillugit maanna kommuunit illoqarfinni nunaqarfinnilu akisussaaffimmik tigummiartuunerat immikkoortitassaavoq, akerlianillu inoqarfiit akornanni aqqusernit pineqartillugit Namminersorlutik Oqartussat Kommuunillu suleqatigiillutik oqartussaaffigisariaqarmassuk.

Siumumi aqqusinertigut attaveqaasersornermut pineqartumut timitaliinissaq anguniarlugu qanorlu aningaasalersorneqarnissaa eqqarsaatigalugu isumaqarpugut aningaasanut inatsisissakkut qulakkeerniarlugu suligasuartoqartariaqartoq, ilaatigut kommuunit aningaasanut inatsit aqqutigalugu isumaqatiginninniarfiginerisigut. Pineqartormi kommuunimut ataasiinnarmut iluaqutissartaqanngilaq, nunamulli tamarmut iluaqutissaavoq ineriartortinniakkap pilersaaruserfigineqarnera kiisalu kommuunip pineqartup suliareersimasai eqqarsaatigalugit.

Naggataatigut Naalackersuisut allannguutissatut siunnersuutaat Siumumiit isumaqataaffiginagu oqaatigissavarput, tassami Naalackersuisut allannguutissatut siunnersuutaat taamaallaat ilisimasanik katersuinissamik siunertaqartutut isumaqarfigivarput, siunnersuuteqartup siunnersuutaattut ilisimasanik katersuivik aqqissuussinernut pilersitsisarnernullu ataqatigiissaariffiusartussaag pineqarani.

Siumumiit taamatut oqaaseqarluta siunnersuut manna Sanaartornermut ataatsimiititaliamut suliassanngortinneqarnissaa inassutigaarput.

Anders Olsen, Siumut